

Aksi Serdang Angels (merah) menentang MSP Hornets di UPM, Serdang, semalam.



Kejohanan Ragbi Super 8 IPT 2019

Serdang Angels, UiTM Lions tepati ramalan



Serdang: Dua kuasa ragbi institusi pendidikan tinggi (IPT), Serdang Angels dari Universiti Putra Malaysia (UPM) dan UiTM Lions (Universiti Teknologi MARA) menepati ramalan mara apabila ke separuh akhir Kejohanan Ragbi Super 8 IPT 2019 selepas tamat aksi peringkat kumpulan petang semalam.

Pasukan Serdang Angels yang juga juara lima kali kejohanan meneruskan langkah selepas menewaskan pasukan semi finalis tahun lalu, MSP Hornets, 36-0 semalam.

Sebelum itu, pasukan berkenaan yang turut diperkuatkan tiga pemain kebangsaan iaitu Mohamad Khairul Abdilah Ramli, Lawrence Petrus dan Muhamad Hafizin Aiman Halim mudah membela skuad UTP Drillers, 98-0 dan IIUM Mustangs, 55-20.

Sebagai juara Kumpulan A, pasukan ini akan membuat perhitungan di separuh akhir menentang MASKOM Eagles yang melakar kejutan mara ke peringkat berkenaan buat kali pertama selaku naib juara

Kumpulan B.

UiTM Lions yang turut dibarisi dua pemain kebangsaan iaitu Mohamad Faris Pead dan Muhammad Danial Noor Hamidi terlebih dahulu mengesahkan tempat ke separuh akhir selepas mengekalkan rekod tanpa kalah pada aksi kumpulan.

Pasukan berkenaan juga terlalu sukar digugat apabila tiada masalah muncul juara Kumpulan B selepas menewaskan UM Blues, 44-7 selain MASKOM Eagles, 38-5 dan UNIKL RC

dengan keputusan 53-6. Pada saingan separuh akhir, mereka akan menentang naib juara Kumpulan A, MSP Hornets.

Kejohanan Ragbi Super 8 IPT disertai lapan pasukan yang merangkumi empat pasukan mewakili Majlis Sukan Universiti Malaysia (MASUM) manakala dua daripada Majlis Sukan Institusi Pendidikan Tinggi Swasta (MASISWA), satu pasukan Majlis Sukan Politeknik (MSP) dan satu Majlis Sukan Kolej Komuniti (MASKOM).